

განვლილ შაბათს გაიმართა სსრ კავშირის 50-ე საფეხბურთო ჩემპიონატის 24-ე ტურის მატჩები უმაღლესი ლიგის გუნდებს შორის.

„არარატი“ (ერევანი) - „დინამო“ (თბილისი) 2:1 (0:1).

ერევანი. „რაზდანის“ სტადიონი. 12 სექტემბერი.

„არარატი“: პოდშივალოვი, კირაკოსიანი, სარქისიანი, ხაჩატრიანი, პოლოსიანი, ჩილინგარიანი, მარქარიანი, აივაზიანი (ხაშმანიანი, 60), ქოჩარიანი (აკოფიანი, 38), ვერანიანი, ოსიპიანი.

„დინამო“: გაბელია, ცვეიბა, ჩივაძე, ჭვდია, არზიანი, რევიშვილი, სვანაძე, სულაქველიძე, კაკილაშვილი (გუბაზი, 46), გურული, შენგელია.

მსაჯი ს. ჰუსეინოვი (მოსკოვი).

მინდვრიდან გააძევეს ცვეიბა და სარქისიანი.

დუბლიორები - 1:0.

მატჩის შედეგის პრაქტიკულ მნიშვნელობაზე ლაპარაკი ზედმეტია. ერევნელმა ფეხბურთელებმა რამდენიმე წარუმატებელი შეხვედრის შემდეგ ბოლო ხანებში საგრძნობლად გაიუარესეს მდგომარეობა სატურნირო ცხრილში და თავიდან სჭირდებათ ბრძოლა პირველ ხუთეულში მოსახვედრად. ხუთეული კი გაისად ევროპულ საკლუბო ტურნირში მონაწილეობის უფლებას იძლევა. რაც შეეხება თბილისის „დინამოს“, მისი ფრიად არასახარბიელო მდგომარეობა ყველას კარგად მოგეხსენებათ, დაუმატეთ ამას ამ ორი გუნდის ტრადიციული მეტოქეობა საკავშირო შეჯიბრებებში და გასაკვირი არ იქნება, რომ მატჩი უკიდურესად დაძაბულ, შეუპოვარ ბრძოლაში ჩატარდა.

ეს დაძაბულობა ნათლად იგრძნობოდა პირველივე წუთებიდან. შეიძლება ითქვას, რომ არც ერთი მხარე არც ცდილა ტექნიკური მომზადებით ან ტაქტიკური მანევრებით, წმინდა სპორტული კლასის მეშვეობით მიეღწია უპირატესობისთვის. მინდორზე დასაწყისიდანვე უკომპრომისო ბრძოლა გაჩაღდა. ორივე გუნდის ფეხბურთელები თამაშობდნენ მთელი ძალით, მთელი მონდომებით, თავგამოდებით და ამ ბრძოლაში „არარატს“ გარკვეული ტერიტორიული უპირატესობა ეპყრა. ბურთს უმეტესად ერევნელი ფეხბურთელები ფლობდნენ, მაგრამ დინამოელები ყოველ შესაძლო შემთხვევაში სწრაფად და მოულოდნელად ახორციელებდნენ კონტრშეტევებს. სწორედ ასეთი კონტრშეტევების დროს „არარატის“ კარი ძელმა იხსნა, მაგრამ მოგერიებულ ბურთს მიუსწრო ჩივაძემ და გახსნა ანგარიში - 1:.

გაშვებული გოლის შემდეგ მასპინძლები გამუდმებით უტევენ, დინამოელები კარგა ხანს ძირითადად თავს იცავდნენ და მხოლოდ ტაიმის დასასრულს შეძლეს მდგომარეობის გათანაბრება.

ხანგრძლივი იერიშებით დაიწყეს ერევნელებმა თამაში მეორე ტაიმშიც. 69-ე წუთზე არბიტრმა ს. ჰუსაინოვმა მიიჩნია, რომ ჩივაძემ განზრახ ხელით ითამაშა და 11-მეტრიანი დანიშნა, რომელიც ზუსტად გამოიყენა ხაჩატრიანმა - 1:1.

ს. ჰუსაინოვს 78-ე წუთზე მეორე 11-მეტრიანის დანიშვნა მოუხდა დინამოელთა კარში. ამჯერად მცველის უხეში თამაშისთვის და ხაჩატრიანმა ზუსტი ანალოგიით შეასრულა მეორე დარტყმა. გაიმარჯვა „არარატმა“ – 2:1.

მატჩი ერევანში, ვიმეორებთ, ძალზე მძიმე, ნერვიული და დაძაბული იყო. თბილისის დინამოელებმა მთლი მონდომებით, ენერგიულად იბრძოლეს და, თუმცა, ცალკეულ მოთამაშეთა კლასი ჯერ კიდევ შორსა დგას სასურველისგან, ქულის აღება უდავოდ შეიძლებოდა. მაგრამ, ჩვენი აზრით, ამ ეპიზოდში, როცა მეორე პენალტი დაინიშნა, მცველს შეეძლო წესის დარღვევა აერიდებინა თვიდან, სიტუაცია არ იყო ისეთი უიმედო, რომ მარტოოდენ ამგვარ იძულებით დარღვევას შეეძლო მდგომარეობის ხსნა.

არ შეიძლება სხვა მომენტსაც აუუაროთ გვერდი. მხედველობაში გვაქვს ა. ცვეიბას უდისციპლინო საქციელი, რის გამოც იგი მინდვრიდან გააძევეს. ა. ცვეიბა ამჟამად თბილისის „დინამოს“ ერთ-ერთი წამყვანი, საყრდენი მოთამაშეა. იგი მეტად მნიშვნელოვან ფუნქციებს ასრულებს გუნდში. მის თამაშზე ბევრი რამაა დამოკიდებული.

“ლელო”, 15.09.1987